



Inatsisartuni ilaasortaq Akitsinguaq Olsen, Siumut

Kalaallit Nunatta kujataani suliffissaqartitsiniarneq pillugu § 36 naapertorlugu apeqquteqaat

Inatsisartuni ilaasortaq Akitsinguaq Olsen, Siumut Naalakkersuisunut imaattunik apeqquteqaateqarpoq:

- **Kalaallit Nunatta kujataani suliffissaqartitsiniarnikkut periarfissanik nutaanik pilersitsinissamik Naalakkersuisut sunik pilersaaruteqarpat?**
- **Pilersaarutit qaqugu aallartisarneqassappat qanorlu aaqqissuussinerit atuutilernissaat ingerlanniarneqarpat?**
- **Tamatumanittaaq ilanngullugit nuna tamakkerlugu suliffeqarfiutillit minnerit qanoq periarfissanik ammaassiffiginiarneqarpat, assersuutigalugu sanaartormik ingerlatsisut minnerit?**

Akissut:

Siusinnerusukkut oqaatigereersimasattut kujataani suliffissaqartitsiniarnikkut massakut atugassarititaasut Naalakkersuisunit ilungersunartorujussuurtut isigineqarput. Tamaattumik Naalakkersuisut siunissaq ungasinnerusoq isigalugu aaqqiissuteqarsinnaanissaq anguniarlugu Kommune Kujallermi inuussutissarsiornikkut suliffissaqartitsiniarnikkullu aallartitanik juni 2010-mi ataatsimeeqqateqaqattaarput.

Narsami Royal Greenlandip suliffissuanik matusineq suliffissuarmi sulisut aalajangersimasut pingasut-sisamat sulisullu nalunaaquttap akunnemusiallit arlallit soraarsinneqarnerinik kinguneqarpoq. Matusinnermut tunngavigineqarpoq tunisassiassat tulaassorneqartartut ikilismanerannik saarullinnullu nunarsuarmi akigitinneqartut ajorseriansimaneramik, tassalu niuernikkut pissut aallaavigalugit Royal Greenlandip Narsami suliffissuarmik ingerlatsinera imminut akilersinnaajunnaarsimavoq. Tamannalu niuernikkut pissutsit aallaavigalugit aalajangerneruvoq, Naalakkersuisut akuersaaginnartariaqagaat.

Suliffissat nutaat pilersinneqartut imminut akilersinnaasuusariaqarput, taamaattumillu Naalakkersuisut inerisarneqarsinnaasut arlallit misissorpaat Kalaallit Nunatta kujataanut pingaaruteqarsinnaasut. Tamakku Nunap Immikkoortuani Ineriartortitsinissamut Periusissat aqputigalugit misissoqqissaarneqassapput. Periusissanik suliaqarneq aallartinneqareerpoq. Periarfissat ilagisinnaavaat Kalaallit Nunatta kujataani inuussutissanik tunisassiornikkut annertussaasinnaaneq, siunissami annerusarneqarluarsinnaasoq najukkani

30. juli 2010
Sagsnr.

Postboks 1601
3900 Nuuk
Tlf. (+299) 34 50 00
Fax (+299) 32 56 00
E-mail: isiin@nanaoq.gl
www.nanaoq.gl

suliffissaqarniarnikkut nunattalu aningaasaqarniarnernut iluaqutaasussamik. Periarfissaq taana pillugu Kommune Kujalleq oqaloqatigilluarneqareerpoq.

Suliniutit piviusut allat Kommune Kujallermit aallartinneqareersut makkuupput:

- Nanortalimmi Alluitsup Paanilu puisit amiinik tunisisarneq pillugu KNAPK Great Greenlandillu akornanni ulloq 16. april 2010 akit pillugit isumaqatigiissuteqartoqarpoq.
- Naleqarnerulersitsisarneq pillugu workshop-ertitsisoqassaaq 15.-17. September 2010 inuussutissarsiornermut tunngasunik atorfeqartitat namminersortullu pilersitsisinnaanermik aallaaveqartumik eqqarsartalermissaat kiisalu tunisassianik ineriartortitsinikkut sullissinernilu aningaasanik isertitaqarnerulersinnaanissaq anguniarlugit.
- Aatsitassat eqqarsaatigalugit Greenland Minerals and Energy-p Kuannersuarmi aatsitassarsiortoqalersinnaalerneratigut suliffissanik nutaanik amerlasuunik pilersitsisoqarsinnaasoq nalilersimavaa, taqqavani najugartunit PKU-mik aqqissuussinerit aqqutigalugit piginnaanngorsarluni pikkorissarneqareernerisigut suliffiqalersinnaasussamik. Aatsitassarsiortoqalissappalli tamanna isumannaatsumik ingerlanneqartariaqarpoq, pinngortitamut innuttaasunullu ajoqutaalersitsinngitsumik. PKU-mik pikkorissartitsinerit peqataasunut akeqassanngillat ingerlaavartumillu ingerlanneqartassallutik.
- Narsap Qaqortullu akornanni Kangerluarsummi Edaly-imik paaasinnaanissamik pilersaarummut tunngatillugu imminut akilersinnaassusaannik inaarutaasumik misissuinerit 2010 naatinnagu naammassineqassapput. Akilersinnaassutsimik misissuinerit ajunngitsumik inerneqassappata ingerlatseqatigiiffik pilersaarummik ingerlatsisoq paaasinnaanissamik ilutigalugu qinnuteqassangatinneqarpoq. Taamaattoqassappat sanaartornerit 2011-imi aallartinneqarsinnaassapput ukiullu tulliani tunisassiorneq aallartinneqarluni. Massakkuugallartoq naatsorsuutigineqarpoq aatsitassarsiorfivimmi inuit 80-it sulisorineqarsinnaassasut. Aatsitassarsiulernerup malitsigisaanik tamatuma saniatigut taqqavani suliffiit allat pilersinneqajortortussaassapput. Taqqavi najugartut suliffissaqarluarsinnaalissapput ilaatigut Sisimiuni aatsitassarsiornermut ilinniartimmi ilinniartinneqareernermikkut.
- Inuussutissanik tunisassiornerup ineriartortinneqarnissaannut atugassanik Inuussutissarsiornermut Suliffeqarnermullu Naalakkersuisoqarfik Kommune Kujallermit aningaasanik tapiissuteqareerpoq. Kommune piginnaanngorsarnissamik pikkorissartitsereerpoq Kalaallit Nunattalu kujataani inuussutissat pillugit qarasaasiaq aqqutigalugu quppersakkamik pilersitsereerluni. Inuussutissarsiutip taassuma ineriartortissinnaanera kommunemit aallunneqarnerulerneratigut taqqavani misigisassarsiornermik inuussutissarsiuteqartut ineriartortitsivigineqarsinnaanissaat annertusineqassaaq. Tamatuma kingunerisaanik takornariartitsinerimi, savaatilinni, akunnittarfinni neriniartarfinnilu aningaasat kaaviiartitat annertusitinneqarsinnaassapput.
- Narsami Eskimopelsimi inuusuttunut pilersaarutip ingerlanneqarnissaa aningaasaliffigineqareerpoq. Pilersaarut inuussutissarsiuteqartut namminersortut suleqatigalugit tunisassiornermik atuarfittut najukkami ingerlanneqartussaq. Pilersaarut aasaanerani sulinggifteqarneq naammassippat allaartinneqassaaq.

Ilinniartitseqqinneq piginnaangorsarnerlu suliassaapput pingaaruteqarluinnartut. Taamaattumik ullumikkut periarfissaareersut soorlu PKU-mik pikkorissartitsinerit, piaersarfiit, nuttarsinnaanermut aningaasaliissutit kiisalu piginnaangorsaqqinnissamut aqqissuussinerit aqutugalugit Kommune Kujalliuup pisariaqartitai kissaataalu pillugit oqaloqatigiinnerit aallartereersimalerpagut.

Tamatuma saniatigut Kommune Kujallermi 2010-2011-imi piginnaasassaviit pillugit pilersaaruteqarpoq sulisinnaasut piginnaasaat paasisassarsiorfiginiarlugit, taamaasiortoqarneratigutllu sulisinnaasut ataasiakkaat piginnaangorsarnissamik kaammattorneqarsinnaaqqullugit aammalu -ilaatigut Islandimi misilittakkat naapertorlugit - misilittakkat naapertorlugit tamakkiisumik ilinniagaqarnerit sivikillineqarsinnaaqqullugit.

Naalakkersuisut suliffeqarfinnut mikinerusunut suliniutaat, nuna tamakkerlugu siammarsimasut, eqqarsaatigalugit isumaqarpugut suliffeqarfiit namminneerlutik nalilertariaqaraat suliffeqarfitsik nuuttariaqarnerisoq, allanik kattuteqarnermikkut anginerusunngortikkusussinnaanerlugu , suliffeqarfissuannngortikkusussinnaanerlugu imaluunniit niuernikkut atugassarititaasut naapertorlugit unamilligassat qanoq iliuusseqarfigerusunnerlugit. Taamaattumik Kalaallit Nunaanni Sulisitsisut Kattuffiata ilaatigut suliffeqarfiit mikinerusut sulianik annertuunut ikorfartuisartut ilisimaneqarnerulernissaat anguniarlugu Suppliers Network Event 2010 26. maj 2010-mi ingerlassimasaa Naalakkersuisut pitsaasutut isigaat. Naalakkersuisut suliffeqarfiit kaammattuinnassavaat periarfissanik taamak ittunik alaatsinaaqqullugit peqataaqqullugillu.

Inussiarnersumik inuulluaqqusillunga
Med venlig hilsen

Ove Karl Berthelsen